

Trais dis en la chanzlia federala

Ina brochura sco in film

■ **(anr/vi) Ils blers Rumantschs san che Corina Casanova è chanceliera federala. Ma tge che capita en la chanzlia federala, gliez san mo paucs. Ina brochura gratuita dat scleriment davart la pli veglia instituziun svizra che gia Napoleon Bonaparte ha fundà.** «La chanzlia federala – Attenziun, il film cumenza!» è il titel da la brochura ch'è propri bajegiada sin in pau sco in film in sco in diari. I cumenza il mardi en damaun: «10.00: La chanceliera federala arriva en chasa federala vest, turnond d'ina occurrenza publica en ina scola auta professiunala. Il tema da ses referat è stà il svilup dal sistem electronic da votar e d'eleger.» Suenter sto la chanceliera – malgrà ch'el-



La Rumantscha Corina Casanova dirigia la chanzlia federala.

KEYSTONE

la avess gia daditg da preparar la sesida dal cussegl federal da la mesemna – prender encunter las suttascripziuns dad in'initiativa dal pievel. En ses biro retschaiva ella ina delegaziun dal comité d'initiativa.

A las 11.30 èsi la finala uschè lunsch e la chanceliera po sa deditgar a las preparativas da la sesida per la regenza svizra. En media stattan var 80 fatschentas sin la glista da tractandas. En il decurs dal di vegn mintga fatschenta discutada «punct per punct, mintga proposta al cussegl federal vegn examinada formalmain e giuridicain». Anc a las 21.00 arrivon per fax ils ultims cunterrapports or dals departa-

ments ed ils collavurants da la chanzlia endateschan quels.

La mesemna ha lura lieu la sesida dal cussegl federal. La brochura explitgescha pass per pass tge che capita e tge rolla che la chanzlia federala gioga.

La gievgia cumenza gia la preparaziun per la proxima sesida e la chanzlia ha sa chapescha anc d'ademplier sias autras funcziuns, pertge ella n'è gea betg mo il post da stab dal cussegl federal.

La brochura porscha in maletg viv ed entelgiaivel da la complexitad da questa instituziun cun ses 250 collavurants.

La publicaziun pon ins retrair gratuit tar www.bundespublikationen.admin.ch u 031 325 50 50.